


**TEZAU LITURGIC**  
**16 IUNIE**

**ACATISTUL**  
**SF. CUVIOS**  
**MOISE PUTILOV**  
**DE LA OPTINA**



**MOSCOVA, 2000**



# АКАФИСТ ПРЕПОДОБНОМУ И БОГОНОСНОМУ ОТЦУ НАШЕМУ МОИСЕЮ, СТАРЦУ ОПТИНСКОМУ

## Кондак 1

Избранному старцу Оптинскому, Скита усердному строителю и киновии Оптинская возродителю, похвальная принесем пения, но яко имеяй дерзновение от бед и искушений избавляти, услыши нас с любовью тебе зовущих:

Радуйся, Моисее, обители Оптинская благоукрашение.

## Икос 1

Ангельскому житию подражати желая, мир отринул еси и добродетели узкий путь избрав, в пустыни пожил еси и ангелолепным нравом украсился еси, сего ради восхваляем тя сице:

Радуйся, имже чистота сердечная сияет;

Радуйся, имже печаль житейская исчезает.

Радуйся, от мирския суеты отречение;

Радуйся, ангельския тишины взыскание.

Радуйся, высоте молитвенного преуспевания;  
Радуйся, глубине смиренного мудрствования.  
Радуйся, яко еси иночествующих утверждение;  
Радуйся, яко еси мирским утешение.  
Радуйся, светило незаходимых бдений;  
Радуйся, таинниче богооткровений.  
Радуйся, имже пустыннолюбцы похваляются;  
Радуйся, имже смиреннолюбцы възиграются.  
Радуйся, Моисее, обители Оптинской  
благоукрашение.

## **Кондак 2**

Безмолвия тишину возлюбил еси, отче Моисее,  
со пустыннолюбцами Рославльских лесов  
вселился еси, и неплодие души твоея  
в благоплодие претворил еси теплыми трудами  
послушания, Богу непрестанно взывая:  
Аллилуиа.

## **Икос 2**

В разум истинный хотя приити, отреклся еси  
ветхаго мудрования и выю подклонил еси  
в послушание отцем духовным, иже свободиша  
тя от пут мирскаго мудрования. Темже яко  
свободу во Христе улучившему, поем тебе сице:

Радуйся, послушания звездо восходящая;

Радуйся, смирения зеркало светящее.

Радуйся, течение скорейшее по лестнице добродетелей;

Радуйся, отсечение греховных воли нужднейшее.

Радуйся, Рославльских лесов небесный гражданин;

Радуйся, пустынных отцев прилежный ученик.

Радуйся, ангелов тихообразное сопребывание;

Радуйся, демонов многоплачевное прогнание.

Радуйся, духовное пустыни сокровище;

Радуйся, светлое чаши обителище.

Радуйся, славию псалмогласный;

Радуйся, голубе смиреннлюбивый.

Радуйся, Моисее, обители Оптинския благоуукрашение.

### **Кондак 3**

Градом прибежища явися ти дебрь  
Рославльская, в ней же от мятежа градскаго  
укрылся еси и яко село сладкое обрел еси  
ту пажить покаяния, плодоносящее Богу  
непрестанную песнь: Аллилуиа.

### Икос 3

Добро и красно пожил еси, отче Моисее,  
в Рославльских лесах со старцы твоими, темже  
яко миро сходящее на душу твою приял еси  
благодать Всесвятаго Духа и украсился еси  
иноческими добродетельми. Сего  
ради восхваляем тя сице:

Радуйся, садоделателю первозданныя простоты;

Радуйся, крине беловидныя чистоты.

Радуйся, розго безмолвнаго веселия;

Радуйся, грозде сердечнаго умиления.

Радуйся, воздержания трапезо приятная;

Радуйся, трезвения высото прозарная.

Радуйся, яко цветник отеческий процветаеши;

Радуйся, яко ароматом молитвы благоухаеши.

Радуйся, подвижничества правило вернейшее;

Радуйся, страстей побеждение сильнейшее.

Радуйся, яко возделал еси в души твоей сад  
нетления;

Радуйся, яко стяжал еси плоды богопознания.

Радуйся, Моисее, обители Оптинския  
благоукрашение.

## **Кондак 4**

Единого Бога взыскал еси умною молитвою,  
Единому вручил еси все житие твое,  
преподобне, и во объятии Отча промысла  
присно покоился еси, благодарно взывая:  
Аллилуиа.

## **Икос 4**

Желание монахолюбиваго иерарха Филарета  
услышал еси, отче Моисее, иже устроить Скит  
по образу древних подвижников восхоте,  
необинуяся притекл еси в дальнии приделы  
Калужския. Он же прозрев в тебе богомудраго  
настоятеля, возрадовася зело, глаголя сице:

Радуйся, пустыни воспитание;

Радуйся, Предтечи подражание.

Радуйся, чистоты усердное хранение;

Радуйся, Предтечева храма украшение.

Радуйся, постничеством яко дивииим медом себе  
питавай;

Радуйся, подвижничеством яко вельбужиим  
мехом себе согревай.

Радуйся, отеческих преданий основательное  
водружение;

Радуйся, иноческих уставов неуклонное  
соблюдение.

Радуйся, твердое безмолвия ограждение;

Радуйся, невозмутимое молитвенником отишие.

Радуйся, имже Скит устрояется;

Радуйся, имже Оптиная пустынь возрождается.

Радуйся, Моисее, обители Оптинския  
благоукрашение.

### **Кондак 5**

Звезду боготечную узрев в Скиту Промыслом  
явленную, икону Богородичную «Знамение», юже  
яко светильник поставил еси с братом твоим  
в церкви Предтечевой, Тоя бо ради ходатайства  
познасте Промыслителя вашего и молитвою  
достигосте Недостижимаго в радости поюще  
Ему: Аллилуиа.

### **Икос 5**

Иноческих подвиги ваша видя монахолюбивый  
иерарх, иже постави вы в главу угла Оптины  
пустыни, брата твоего во игумены Скита,  
тебе же в настоятеля богомудраго. Сего  
ради восхваляем тя сие:

Радуйся, Скита крепкое основание;

Радуйся, Оптины пустыни благостояние.

Радуйся, красото монашескаго богослужения;

Радуйся, долгого скитскаго псалмопения.

Радуйся, Введенския обители святоизбранный пастырю;

Радуйся, Оптинскаго старчества мудрый созидателю.

Радуйся, монашествующих любвеобильное попечение;

Радуйся, паствы твоя словесною пищею утучнение.

Радуйся, греховных навыков отсечение;

Радуйся, добродетельных плодов прозябение.

Радуйся, иночествующим стено неразоримая;

Радуйся, скитником пристанище невлаемое.

Радуйся, Моисее, обители Оптинския благоукрашение.

### **Кондак 6**

Крест пастырскаго служения от святителя Филарета приял еси, отче Моисее, иже заповедь тебе даде вверенную паству в Царствие Небесное путеводити, ты же, послушание сие добре проходя, Пастыреначальнику Христу

укрепившему тя, не престал еси вопити:  
Аллилуиа.

## **Икос 6**

Лик монашествующих собрал еси, отче Моисее,  
и всем пример незлобия твоего показал еси,  
образ был еси словом и делом и яко солнце  
красное обитель твою чудесными зарями  
облистав. Мы же, лучами любви твоея согретии,  
воспеваем тебе сице:

Радуйся, преподобных похвало;

Радуйся, монашествующих веселие.

Радуйся, многомудрая простото;

Радуйся, херувимское многоочитое бдение.

Радуйся, яко во глубине безмолвия обрел еси  
бисер многоценный;

Радуйся, яко в чистоте сердечней узрел еси свет  
превечный.

Радуйся, яко полк монашествующих  
предводиши;

Радуйся, яко рать бесовскую низлагаеши.

Радуйся, наставниче искусный преуспевающих;

Радуйся, наказателю теплейший  
новоначальнейших.

Радуйся, богослужения прилежный служителю;  
Радуйся, богоугождения художный учителю.

Радуйся, Моисее, обители Оптинского  
благоукрашение.

### **Кондак 7**

Монашествующим пристань тишайшую  
устроить желая, Оптину пустынь, яко духовную  
крепость созидил еси. Не токмо стены  
сооружая, но и храмы душевнии благоустроая,  
еже жити братии вкупе и вопити в мире:  
Аллилуиа.

### **Икос 7**

Небеси подобный град монашествующим  
соградити хотяй, Оптину пустынь яко обитель  
устроил еси небожителей. Крестообразно храмы  
и колокольню в ней разместил еси, и седмью  
башнями украсил еси сию сообразно дарам  
Святаго Духа, темже восхваляем тя сице:

Радуйся, крепосте благочестия;

Радуйся, крестоявленное благолепие.

Радуйся, церквей премудрый зиждителю;

Радуйся, целомудрия верный блюстителю.

Радуйся, семибашенное ограждение  
монашескаго града;

Рауйся, седмистрельное уязвление мысленнаго велиара.

Радуйся, до небеси досязаяй богозданный столпе;

Радуйся, с небеси приникаяй молитвенный свете.

Радуйся, каменю оглажденный многими искушеньми;

Радуйся, сапфире, сияяй искусными ученьми.

Радуйся, общежития градодержателю;

Радуйся, ангельскому ликостоянию подражателю.

Радуйся, Моисее, обители Оптинского благоуукрашение.

### **Кондак 8**

Оптинскаго старчества богорасленным кедром явился еси, отче Моисее, от Рославльских лесов насажден быв в Скиту, идеже возрастил еси дубраву старчества, плодоносящую спасение и вопиющую Богу: Аллилуиа.

### **Икос 8**

Предтеченский Скит соделал еси разсадником благочестия, в немже яко крины сельныя учение старца Паисия процвете и распространися

по всей земли Русстей. Сего ради пожиная класы учений, приношаем тебе хвалы:

Радуйся, процветение целомудрия;

Радуйся, цветоносие воздержания.

Радуйся, терновник страстей посецаай;

Радуйся, трезвением мысли очищай.

Радуйся, лесов Рославльских благоуханный плоде;

Радуйся, скитскаго вертограда сладкосочный грозде.

Радуйся, яко Оптинскую ниву удобрил еси святоотеческим учением;

Радуйся, яко снопы пожал еси украшенныя благочестием.

Радуйся, кедре старческаго окормления;

Радуйся, окрине духовнаго орошения.

Радуйся, имже угобзися житница Слова;

Радуйся, имже наставлени к ведению Бога.

Радуйся, Моисее, обители Оптинския благоукрашение.

## Кондак 9

Радел еси о издательстве книжном, отче Моисее, еже учредив во обители твоей святей, яко же первее в лесах Рославльских словеса святых полууставом списывал еси, ныне же всю землю Русскую книжным учением напоил еси. Сего ради слово премудрости тебе Подавшему вопием: Аллилуиа.

## Икос 9

Словеса твоя яко соль спасительная всем быша, даром бо разсуждения увенчал был еси, темже и наказания во время благопотребно подавал еси и немощным любовью снисходил еси, сице и нас осоли словом твоея премудрости, воспевающих ти сладкопения сия:

Радуйся, премудрости таинниче;

Радуйся, кротости наставниче.

Радуйся, книго одушевленная словес отеческих;

Радуйся, свиреле духовная песней пастырских.

Радуйся, медоречивая устна вразумления;

Радуйся, сладкоглаголивый языче назидания.

Радуйся, реко учений приснотекущая;

Радуйся, руко милостей приснодающая.

Радуйся, яко затмил еси учения еретическия;

Радуйся, яко явил еси красоту Православия.

Радуйся, тросте мудрых изречений;

Радуйся, свитче тайных изъявлений.

Радуйся, Моисее, обители Оптинския  
благоукрашение.

### **Кондак 10**

Терпение совершенное стяжал еси, отче Моисее,  
был еси якоже столп непоколебим в напастех  
и бедах твоих и достиг еси в небурное  
пристанище безстрастия, Умирителю мира  
взывая: Аллилуиа.

### **Икос 10**

Упокоился еси в воли Божией, отче Моисее, всю  
надежду твою на Промысел Божий возложил  
еси, отонудуже и попечение о обители  
Домостроителю спасения нашего вверил еси,  
Иже и созижде обитель твою яко град святых.  
Сего ради восхваляем тя сице:

Радуйся, веро адамантосветлая;

Радуйся, надеждо твердостоятельная.

Радуйся, стено неразоримая искушениями;

Радуйся, забрало противу диавольских  
нападений.

Радуйся, ты бо киновиархом явился еси  
богодохновенным;

Радуйся, ты бо безмолвнолюбцам был еси  
наставником премудрым.

Радуйся, обители незыблемое основание;

Радуйся, братии незлобивое наказание.

Радуйся, блюстителю Божественнаго смотрения;

Радуйся, внезапное скудости восполнение.

Радуйся, сребролюбия изгнание;

Радуйся, нищелюбия стяжание.

Радуйся, Моисее, обители Оптинския  
благоукрашение.

### **Кондак 11**

Фимиам твоих милостей к Престолу Божию  
вознесл еси, отче Моисее, Иже и призре  
на духовныя жертвы твоя и умножил есть  
милость Свою к обители твоей, жертву хвалы  
Ему приносящую: Аллилуиа.

### **Икос 11**

Христоподобную любы стяжал еси, отче  
блаженне Моисее, яко наптал еси всякаго  
странна и нища и убогих миловал еси, от нихже  
благодарственная тебе приносится похвала:

Радуйся, бедствующим вспоможение;

Радуйся, сирых и убогих отдохновение.

Радуйся, милосердия светлая палато;

Радуйся, благотворения царская храмино.

Радуйся, щедрот Божиих море неисчерпаемое;

Радуйся, благоутробия милости неоскудеваемое.

Радуйся, яко неистошимое еси нищих  
сокровище;

Радуйся, яко неиждеваемое труждающихся еси  
вознаграждение.

Радуйся, терпеливодушное молитвенное  
извещение;

Радуйся, чудесное монастырския казны  
обогащение.

Радуйся, безсребреников сопричастниче;

Радуйся, беззлатников наставниче.

Радуйся, Моисее, обители Оптинския  
благоукрашение.

## **Кондак 12**

Царствие Божие наследити сподобился, еси отче  
Моисее, яко прежде всего попечение о стяжании  
Того имел еси и яко мудрый купец нищетою  
духа богатства небесная приобрел еси. Темже

Христу обогатившему тя неподкупным златом смирения, благодарно воззвал еси: Аллилуиа.

## **Икос 12**

Чистотою сердечною мрак страстей разгнал еси, преподобне, чисто зриши ныне Троицы Пречистый Свет и наслаждаешься райскими красотами неизреченными, но не забуди чад твоих во мраке греховнем сущих и благодатного посещения сподоби с любовью тебе зовущих:

Радуйся, чертоже молитвенного озарения;

Радуйся, пучино слезнаго очищения.

Радуйся, кротости и безгневия тихое покоище;

Радуйся, духовнаго разсуждения светлое обиталище.

Радуйся, Оптинского старчества крепкое благособрание;

Радуйся, Предтеченскаго Скита твердое благостояние.

Радуйся, одушевленный образе самопринуждения;

Радуйся, монашеских чинов благоустроение.

Радуйся, любви отеческия неизсякаемый источниче;

Радуйся, милости Божественныя таинственный наперстниче.

Радуйся, имже добродетели послушания научаемся;

Радуйся, имже к смиренномудрию наставляемся.

Радуйся, Моисее, обители Оптинския благоуукрашение.

### **Кондак 13**

О преподобне отче Моисее, киновиарше богодохновенне, призри на нас овец заблудших и яко пастырь добрый к богоугодному житию приведи, настави нас на стези спасения, да избегнув путей греховнаго своеволия, единеми усты и едином сердцем вкупе с тобою поем Богу: Аллилуиа.

### **Молитва**

О, Преподобне отче Моисее, киновии Оптинския возродителю и Скита Предтеченскаго строителю! Ты от юности твоея Христу последовал еси и в дебрех Рославльских непрестанною молитвою Ему усердно послужил еси. Послежде Промыслом Божиим призван был еси крест игуменскаго служения в Оптинстей пустыни понести, идеже ангелоподобное

общезитие насадил еси и безмолвный Скит устроил еси, из негоже яко от чертога Оптинское старчество землю нашу зарею благочестия осияло суть.

Сего ради просим тя, яко верна домоправителя строения Христова и богомудраго пастыря словеснаго стада: утолити раздоры в нас сущия и на стези единомыслия наставить слепотствующии умы наша. Приведи нас на злачныя поля святоотеческих преданий и чистою водою умиления напой жаждущия души наша. Вдохни в нас силу благочестия свыше к подвигу, еже последовати твоему житию богоугодному, да отрешившеся страстей, союзом любви свя□зании, тобою приведени будем к Пастыреначальнику Христу, Ему же честь и поклонение возсылаем со Безначальным Его Отцем и Пресвятым и Благим и Животворящим Его Духом ныне и присно и во веки веков. Аминь.

